



Kabarett „Sachsenmeyer & Co.“  
09224 Chemnitz  
Feenweg 11

Hauptspielstätte:  
Kabarett-Kiste (im Hedwigshof)  
An der Markthalle 8  
09111 Chemnitz

Bestell-Telefon: 0371 - 694 77 11  
[www.sachsenmeyer-kabarett.de](http://www.sachsenmeyer-kabarett.de)  
e-Mail: sachsenmeyer@t-online.de

**17. Kalenderwoche – ab 26. April 2009**

## Aldmohdisch

Isch bin werglisch e bißl aldmohdisch. Ährlisch! Un das nisch bloß, was so de Mohde bedreffn dud... also, Glamoddn un so! Odor ooch de Haare! Nee, isch draache immor noch Fassong - einfarbisch un ohne Musdor!

Ma, nähmbei - gesdorn habbsch een gesähn, een jung Kerl, dähr hadde iborall Gladze un bloß am Hinnorkobb eene Insl mid Haare un eim Zobb! Wie so e Indjahnor vom Schdamme dor Igohehns. Dähr Zobb is wahrscheinlich zum bessoren Schgalbiern!

Nee, da bin isch eschd aldmohdisch. Un isch will misch ja ooch nisch schgalbiern lassn!

Un mid Dahduhs un so... un Biersing un so... nee, das is alles nisch meine Weld! Meine Weld is die von gesdorn! Nee, nisch von vorgesdorn - bloß von gesdorn! Un de Weld von heide, die dud mir abor immor främddor un unheimlichor wärn. Reschleschd gesbänsdisch zum Deel! Was in dor heidischn Weld alles Mohde sein dud...! Bei de jung Leide nadiehrlich vorwieschend. De äldoren Leide dun ja de Mohde nisch mähr so midmachn. Das is schon immor so gewähns. Ooch friehor. Dor Mohde sinn de jung Leide immor am schdärghsdn ausgelieford!

Meine Gudste sachd, de jung Leide häddn een ganz uhrdiemlichsn Drang, sich irschendwie von dor äldoren Genneradsjohn abzugränzn, abzuheem! Die wolln irschendwie annersch sein!

Das is schon immor so gewähns, sachd meine Gudste.

Na scheen, mir sinn dazumals ooch e bißl wie de "Biedels" rumgeloofn odor wie de "Schdohns"...  
abor ehm bloß e bißl! Un das is ja ooch ganz lusedisch gewähsn. Daderdran is ja keenor geschdorm!  
Abor heidzudaache gibbds ehm Mohde, wo se dran schdärm dun, de jung Leide! Zum Besichbiel de  
Sauforei! Die saufn sisch ins Gohma un dun dann abgradzn.

Nee, wenn isch saufn due... wobei das ehm ooch bloß ganz seldn vorkomm dud. Meisdens schdehe  
isch ja unnor diregdor Beobachdung von meinor Gudstn!

Nee, abor ooch wenn isch alleene un ohne Offsichdsbersohn saufn due, dann dud das heeschdens  
bis zu eim geringfügischn Gedäschnisvorlusd fiehrn. Un eim diggn Kobb am näschn Daach. Un  
das ooch bloß dann, wenn isch leischdsinnischerweise zum Reischnbrandor noch e bißl Gombodd  
vorkassemaduggld hab. Ja, isch meene, e Schnäbsl zum Nachdich!

Nee, ins Gohma hab isch misch noch nie gesoffn. Noch nisch ma annähornd! Un von meine  
Kumbls kenn isch ooch keen... also, jednfalls keen, dähr sisch mid Absischd hädde ins Gohma  
sauftn wolln! Un das is ja dähr Bunkd! De Absischd! Dor Vorsadz!

Das is wie, wenn de een annorn umbring dusd. Ohne Vorsadz isses ehm bloß Dodschlach, mid  
Vorsadz isses Mord! Ohne Vorsadz is Besoffnsein Schigsahl, mid isses Doofheid!

Un wieso dun die nu so vorsädzlich saufn bisse umfalln wie de Flieschn? Weil se doof sinn odor  
weils Mohde is? Nee, was bin isch froh, dass isch so aldmohdisch bin.

**Eduard Sachsenmeyer**